


Ini ginadala sa inyo sang
Biblia Para sa mga Bata

Sang Gintuga sang
Dios ang Tanan



Ginsulat ni: Edward Hughes

Gindrowing ni: Byron Unger; Lazarus

Gin-adaptar ni: Bob Davies; Tammy S.

Gin-translate ni: Ramon Torres

Ginpahimo sang: Bible for Children
www.M1914.org

©2014 Bible for Children, Inc.

May kinamatarong ka sa pagkopya ukon pag-imprinta sang sini
nga estorya, basta indi lang pag-ibaligya.




Sin-o ang naghimo sa aton? Ang Biblia, ang Pulong sang Dios, nagasugid sa aton kon paano nagsugod ang tawo. Sang una nga panahon, ginhimo sang Dios ang una nga tawo kag gin-ngalanan niya nga Adan.



Ginhimo sang Dios si Adan halin sa duta. Sang ginhuypan sang Dios sang kabuhi si Adan, nangin buhi siya nga tinuga. Didto siya ginbutang sa matahom nga katamnan nga gintawag Eden.




Antes ginhimo sang Dios si Adan, gintuga niya ang matahom nga kalibutan nga may matahom nga mga bagay.



Sa amat-amat gintuga sang Dios ang mga kabukiran
kag kapatagan, ang mahamot nga mga bulak kag
mataas nga mga kahoy, ang mga pispis nga may
matahom nga mga pakpak kag nagahuni nga mga
buyog, ang nagalutaw nagalutaw nga mga balyena
kag ang madanlog nga mga taklong.



Sang ginsuguran, antes gintuga
sang Dios ang tanan, wala gid
sang bisan ano nga bagay
magluwas sa Dios. Wala
gid sing tawo, lugar,
ukon bagay. Wala
sing kasanag ukon
kadulom. Wala sing
ibabaw ukon idalom.
Wala sing kahapon
ukon palaabuton. Ang
Dios lang ang ara, nga
wala sing may ginsugdan.
Dayon may ginhimo ang Dios.




Sang ginsuguran, gintuga sang Dios
ang langit kag ang kalibutan.




Ang kalibutan sadto
wala pa sing porma
kag mahawan pa.
Ang kadulom
nagatabon
sa ibabaw
sang
tubig.




Dayon nagsiling
ang Dios,
"Magsanag."



Kag nahimo ang kasanag. Gintawag sang Dios nga
"adlaw" ang kasanag kag gintawag niya nga "gab-i"
ang kadulom. Dayon nag-gab-i, kag tapos nag-aga.
Amo ato ang una nga adlaw.




Sang ikaduha nga adlaw, gintingob sang Dios ang mga tubig agod mangin kadagatan kag mangin katubigan. Kag sang ikatlo nga adlaw, nagsiling ang Dios, "Magguwa ang mamala nga duta." Kag natabo ini.



Nagsugo man ang Dios nga magtubo ang mga hilamon,
mga bulak, mga tanom-tanom kag mga
kahoy. Dayon nag-gab-i, kag
tapos nag-aga. Amo
ato ang ikatlo
nga adlaw.




Dayon ginhimo sang Dios ang
adlaw, bulan, kag ang madamo
gid nga mga bituon nga indi
maisip. Dayon nag-gab-i, kag
tapos nag-aga. Amo ato ang
ikaapat nga adlaw.




Sang ikalima nga adlaw
gintuga sang Dios ang mga
isda kag iban pa nga mga
sapat sa dagat, kag ang
mga sapat nga nagalupad.
Ginhimo niya ang tanan
nga klase sang isda sa
kadagatan, kag ang tanan
nga klase sang pispis nga
nagalupad sa ibabaw sang
kadutaan, kadagatan kag sa
kahawaan. Dayon nag-gab-i,
kag tapos nag-aga. Amo ato
ang ikalima nga adlaw.



Pagkatapos sadto, naghambal liwat ang Dios. Siling niya, "Matuga sa duta ang mga buhi nga tinuga ..." Gani natuga ang tanan nga sapat, ang mga insekto, kag ang mga sapat nga nagakamang. Makita ang mga dalagko nga mga elepante kag ang magagmay nga mga ilaga, ang nagadugsing nga mga amo kag ang nagakamang nga mga buwaya, ang gahulag-hulag nga mga ulod kag galumpat-lumpat nga mga koneho. Ang tanan nga klase sang sapat gintuga sang Dios sa sina nga adlaw.



Dayon nag-gab-i, kag tapos nag-aga.
Amo ato ang ikaanom nga adlaw.



May ginhimo pa ang Dios sang ikaanom nga adlaw — isa ka espesyal gid nga bagay. Kag handa na ang tanan para sa sini nga tinuga. May pagkaon na para sa iya sa mga uma kag mga sapat nga magaserbisyo

sa iya. Dayon nagsiling ang Dios, "Mahimo kita sang tawo nga kaanggid naton. Siya ang magadumala sang tanan nga tinuga sa kalibutan."

GANI GINTUGA
SANG DIOS ANG
TAWO NGA
KAANGGID
NIYA ...



Nagsiling ang Dios kay Adan, "Kauna ang bisan ano sa katamnan. Pero indi lang pagkauna ang bunga sang kahoy nga magahatag sang ihibalo parte sa maayo kag malain. Kon kaunon mo ang bunga sini sigurado gid nga mapatay ka."



Kag nagsiling ang Ginoong Dios, "Indi maayo nga nagaisahanon lang ang tawo. Himuan ko siya sang kaupod nga magabulig sa iya."



Ginpatulog sang Dios sing mahamuok gid si Adan. Dayon ginkuha niya ang isa ka gusok ni Adan samtang nagakatulog ini, kag ang gusok ginhimo niya nga si Eva. Ang babayi nga ginhimo sang Dios bagay gid nga pares ni Adan.



Ginhimo sang Dios ang tanan sa sulod sang anom ka adlaw. Dayon ginbendisyunan sang Dios ang ikapito nga adlaw kag ginhimo niya nga adlaw nga inugpahuway.



Sa katamnan sang Eden, bug-os gid ang kalipay ni Adan kag ni Eva nga iya asawa, kag matinumanon sila sa Dios. Ang Dios amo ang ila Ginoo, ang nagahatag sang ila kinahanglanon kag ang ila abyan.



Sang Gintuga sang Dios ang Tanan

Isa ka estorya halin sa Pulong sang Dios,
Ang Biblia,

makita sa

Genesis 1 - 2

"Ang pagpahayag sang imo mga pulong
nagahatag sang kasanag." Salmo 119:130



Ang Katapusan



Ang ini nga estorya sa Biblia nagasugid parte sa aton matahom nga Dios nga nagtuga sa aton kag gusto niya nga makilala mo siya.

Nahibaluan sang Dios nga nakahimo kita sang malain nga mga bagay nga ginatawag niya nga sala. Ang bayad sa sala amo ang kamatayon, pero palangga gid ikaw sang Dios gani ginpadala niya ang iya bugtong nga Anak nga si Jesus agod mapatay sa krus. Ginsilutan siya para bayaran ang imo sala. Dayon nabuhi siya liwat kag nagbalik sa langit. Kon nagatuo ka kay Jesus kag ginapangabay mo siya nga patawaran ka sa imo sala, himuon niya ina! Magasulod siya kag magapuyo sa imo subong, kag magakabuhi ka kaupod niya sa wala sing katapusan.

Kon nagapati ka sa sini nga kamatuoran, ihambal ini sa Dios: Mahal nga Jesus, nagatuo ako nga Dios ikaw, kag nangin tawo agod mapatay para sa akon mga sala, kag subong buhi ikaw. Magsulod ka sa akon kabuhi kag patawara ang akon mga sala, agod may bag-o na ako nga kabuhi, kag sa pila ka adlaw magaupod ako sa imo sa wala sing katapusan.

Basaha ang Biblia kag estoryaha ang Dios adlaw-adlaw! Juan 3:16

